



АҚПАРАТТЫҚ ХАБАР

2018 жылғы 10 шілде

Қазақстан Ұлттық Банкінде сараптамалық қоғамдастық өкілдерімен кезекті кездесу өтті

Бүгін Алматыда Қазақстан Ұлттық Банкі өкілдерінің қаржы сарапшыларымен кезекті кездесуі өтті, оның барысында реттеушінің ақша-кредит саясатының, ақша және валюта нарықтарындағы жағдай мәселелері, сондай-ақ қаржы реттеушісінің базалық мөлшерлемені 9 % деңгейде сақтау туралы шешімі талқыланды.

Қазақстан Ұлттық Банкінің Зерттеулер және статистика департаментінің директоры Виталий Тутушкин дөңгелек үстелге қатысушыларға жылдық инфляцияның 2018 жылғы нысаналы дәліздің ішінде екендігі және Ұлттық Банктің бағалауы бойынша, оның бұдан кейінгі серпіні 2018 және 2019 жылдардағы нысаналы дәліз ішінде қалыптасатыны туралы айтып берді. Алайда сыртқы сектор және бюджеттік саясат тарапынан инфляциялық тәуекелдердің қысқа және орта мерзімді перспективада іске асуының ықтималдылығы ағымдағы жылғы ақша-кредит талаптарын жұмсару әлеуетін шектейді.

Ол инфляцияның Ұлттық Банктің бағалауына сәйкес төмендеу үрдісті жалғастырып отырғанын атап өтті. 2018 жылғы бірінші жартыжылдықта оның деңгейі өткен жылғы осындай кезеңмен салыстырғанда (3,7%) барынша төмен көрсеткіштерді (2,6%) көрсетеді, бұл жылдық инфляцияның маусымда 5,9%-ға дейін баяулауын қамтамасыз етті. «Инфляция деңгейінің төмендеуіне агро азық-түлік нарықтарындағы үрдістердің барынша қолайлы маусымдық ықпалы және ішкі өнім өндірушілердің тұтыну тауарларына арналған бағасының өсу қарқынының баяулауы себепші болды. Алайда, статистикалық есептеулер кезінде ескерілетін инфляция деңгейінің өткен жылғы 3-тоқсанда жоғары болмауынан Ұлттық Банктің бағалауы бойынша ағымдағы жылдың соңына дейін жылдық инфляцияның айтарлықтай баяулауы күтілмейді», - деп түсініктеме берді В. Тутушкин.

Ұлттық Банк өкілінің айтуынша, халықтың инфляциялық күтулері салыстырмалы орнықтылықты көрсетіп отыр. Бір жыл алға күтілетін инфляцияны сандық бағалау маусымда ағымдағы жылдың ақпан және мамыр айларының деңгейінде 6,0% болды. Күтулердің наурыздағы (неғұрлым төмен) және сәуірдегі (неғұрлым жоғары) өзгеруі ағымдағы нарықтық жағдайлардың әсер етуін көрсетті.

«Халықтың инфляцияны қабылдауы жақсаруда. Пікіртерімнің «тауарлар мен қызметтердің өткен 12 айдағы бағасы бұрынғыға қарағанда, жылдамырақ өсті» деп санайтын респонденттерінің үлесі маусымда бақылау жасалып отырған бүкіл кезеңдегі ең төменгі деңгейде қалыптасып, 44,2%-ды құрады. Тұтыну бағасының өткен жылға қарағанда төмендегенін немесе төмендеп отырған серпінін атап өткен респонденттердің үлесі ең жоғары тарихи мәнді – 22,5%-ды көрсетіп отыр», - деп хабарлады В. Тутушкин.

Ол экономикалық белсенділіктің өсу серпіні оң екендігін айтып берді. Қысқа мерзімді экономикалық индикатор қаңтар-мамырда жылдық көрсеткіш бойынша 5,1%-ды құрады. Өсуге оң үлесті барлық негізгі салалар – тау-кен өндіру және өңдеуші өнеркәсіп, байланыс, сауда, көлік және ауыл шаруашылығы қосты.

«Бұл ретте экономикалық өсудің көрсеткіштері өзінің әлеуетті мәндерінен жоғары және оны ішкі және сол сияқты сыртқы тұтынушылық және инвестициялық жиынтық сұраныстың кеңеюі ұстап тұр, бұл экономикаға проинфляциялық қысым жасайды. Тұтынушылық жиынтық сұраныстың кеңеюін қамтамасыз етуді жалғастыратын факторлардың бірі бюджет саясатының әлеуметтік бағыты болып қалады», - деп қорытындылады В. Тутушкин.

Ол сыртқы нарықтардағы ахуал түрлі бағытты көрсетіп отырғанын айтты. «Мұнай бағасының серпіні оң әсерін жалғастыруда, баға бір баррель үшін 70 АҚШ доллары көрсеткіштерінен жоғары болып қалыптасты, бағаның бұдан былайғы серпіні жөніндегі сарапшылардың болжамдары қолайлы болып қалуда. Маусымда жыл басынан бастап алғаш рет азық-түлікке деген халықаралық бағалардың төмендеуі байқалды. FAO бағалар индексі 1,3%-ға төмендеді, бұл елдер арасындағы сауда шиеленісінің күшеюімен байланысты. Астық бағасының төмендеуі байқалды. Алайда негізгі дәнді дақылдар өндірісі бойынша болжамдар нашарлауда, бұл инфляциялық аяны күшейтуі мүмкін», - деді В. Тутушкин.

Ол орта мерзімді кезеңде саудадағы негізгі әріптес елдерде инфляция деңгейінің күтілетін көтерілуіне байланысты проинфляциялық қысымның болуы ықтимал екенін атап өтті.

«Маусымда сыртқы монетарлық талаптарды қатаңдату нәтижесінде АҚШ долларының әлемдік нарықтарда күтілетін нығаюы және теңгені қоса алғанда, дамушы нарықтардың валюталарынан капитал ағындары бағытының АҚШ долларына өзгеруі байқалды. Атап айтқанда, Ұлттық Банктің қысқа мерзімді ноттарының көлемі бейрезиденттерде ағымдағы жылғы наурыз – маусым аралығында 454 млрд теңгеден 241 млрд теңгеге дейін төмендеді, бұл теңгенің әлсіреуі факторларының бірі болды», - деді В. Тутушкин.

Сонымен қатар ол дөңгелек үстелге қатысушыларға ақша-кредит талаптарының бейтарап деңгейде қалуының жалғасуда екенін хабарлады. Орнықсыз сыртқы факторлар мен проинфляциялық тәуекелдердің іске асырылуы ықтималдығы аясында инфляциялық күтулерді басқару мақсатында ақша-кредит талаптары сипатының неғұрлым қатаң сипатқа өзгеруі жоққа шығарылмайды.

Қорытындылай келе, «ақша-кредит саясатының операциялық бағдары - TONIA индикаторы базалық мөлшерлеменің пайыздық дәлізінің төменгі шекарасына жақын болуын ескере отырып, Ұлттық Банк ақша-кредиттік реттеудің операциялық тиімділігін арттыру мүмкіндігін де қарастырады. 2018 жылдың екінші жартыжылдығында дәліз шекараларын тарылту орындылығы мәселесі зерделенетін болады», - деп атап өтті В. Тутушкин.

Таныстырудан кейін Қазақстан Ұлттық Банкінің өкілдері сарапшылардың сұрақтарына жауап берді, олар осы сияқты кездесулерді өткізудің маңыздылығын атап өтті.

Қазақстан Ұлттық Банкінің сарапшылармен кездесуді қаржы реттеушісінің нарықпен және жұртшылықпен белсенді коммуникациялары саясатының шеңберінде тұрақты негізде өткізетінін атап өтеміз. Базалық мөлшерлеме бойынша кезекті шешім 2018 жылғы 3 қыркүйекте Астана уақытымен сағат 17:00-де жарияланады.

Толығырақ ақпаратты БАҚ өкілдері мына телефон арқылы алуына болады:

+7 (727) 704 585

e-mail: press@nationalbank.kz

www.nationalbank.kz